

四庫全書

子部

欽定四庫全書

子部十

春明夢餘錄

雜家類三 雜說之屬

提要

臣等謹案春明夢餘錄七十卷

國朝孫承澤撰承澤有尚書集解已著錄是書

首以京師建置形勝城池畿甸次以城防宮

殿壇廟次以官署終以名蹟寺廟石刻巖麓

川渠陵園似乎地志而叙沿革者甚畧分列

官署似乎職志每門多錄明代章疏連篇累
牘又似乎故事體例頗為龐襍且書中標目
悉以明制為主則不當泛及前代既泛及前
代則當元元本本絲牽繩貫使端委粲然不
當挂一漏萬每門寥寥數語或有或無絕不
畫一即如禮部第一子目標曰禮制而首以
朱子儀禮經傳通解一條次以吳澄三禮考
注一條又次以朱子家禮一條此儒者之著

述非朝廷之典章不當繫于禮部又周與宋之舊文非明代之新制尤不當繫于明之禮部是何義也太醫院自叙官一條外皆雜錄古人醫書序文及諸脈論以足一卷此無論不能偏載即偏載之何預明太醫院然則翰院門將備錄歷代制誥詩賦耶又承澤沿門戶餘波持論皆存偏黨如萬厯以後厯法差分衆論交爭至崇禎中西法中法喧呶彌甚

此沿革之大者乃欽天監門于鄭世子載堉
諸說今見于明史者悉刪不錄于徐光啓等
改法之事亦僅存其畧且謂舊法不過時刻
之差不害于事又謂新法將來亦必差殊有
意抑揚不為平允蓋其時論者多攻大統厯_而
大統厯曾經許衡叅修承澤以講學家宗
派所繫故為之左袒其反覆以衡為詞宗旨
了然可覩也又周延儒招權納賄賜死非枉

承澤乃于內閣門中錄其直房記一篇以為
美談復于刑部門中以閣臣公救延儒揭列
之慎刑條下益率是非之公矣其好惡性情
往往如是蓋不足盡據為典要然于明代舊
聞採摭頗悉一朝掌故實多賴是書以存且
多取自實錄邸報與稗官野史據傳聞而著
書者究為不同故考勝國之軼事者多取資
于是編焉乾隆四十二年三月恭校上

欽定四庫全書

提要

三

總纂官

臣紀昀

臣陸錫熊

臣孫士毅

總校官

臣

陸

費

墀

欽定四庫全書

子部十

春明夢餘錄目錄

雜家類三

雜說之屬

卷一

建置

卷二

形勝

卷三

城池

卷四

畿甸

卷五

城防

卷六

宮闕

宮官

內官監

卷七

正殿

卷八

殿門

卷九

文華殿

卷十

文華傍室

卷十一

武英殿

仁智殿

卷十二

文淵閣

卷十三

皇史宬

卷十四

天壇

祈穀壇

神樂觀

犧牲所

卷十五

山川壇

神祇壇

太歲壇

先農壇

旗纛廟

卷十六

地壇

朝日壇

夕月壇

卷十七

太廟

卷十八

奉先殿

景神殿

玉芝宮崇先殿

卷十九

社稷壇

先蠶壇

高禩臺

西海神祠

卷二十

帝王廟

卷二十一

文廟

卷二十二

三皇廟

都城隍廟

漢壽亭侯廟

宋丞相文信國祠

于少保忠肅祠

卷二十三

內閣一

卷二十四

內閣二

卷二十五

六科

卷二十六

尚寶司

卷二十七

光祿寺

卷二十八

中書科

卷二十九

宗人府

卷三十

五軍都督府

卷三十一

戎政府

卷三十二

翰林院

卷三十三

詹事府

卷三十四

吏部

卷三十五

戶部一

卷三十六

戶部二

卷三十七

戶部三倉場

卷三十八

戶部四寶泉局

卷三十九

禮部一

卷四十

禮部二

卷四十一

禮部三

貢院

卷四十二

兵部一

卷四十三

兵部二

卷四十四

刑部一

卷四十五

刑部二

卷四十六

工部一

卷四十七

工部二

寶源局

卷四十八

都察院

卷四十九

通政司

卷五十

大理寺

卷五十一

太常寺

卷五十二

四譯館

卷五十三

太僕寺

卷五十四

國子監

卷五十五

府學

卷五十六

首善書院

卷五十七

太醫院

卷五十八

欽天監一

卷五十九

欽天監二
觀象臺

卷六十

鴻臚寺

卷六十一

行人司

卷六十二

上林苑

卷六十三

錦衣衛

卷六十四

名蹟一

卷六十五

名蹟二

卷六十六

寺廟

卷六十七

石刻

卷六十八

巖麓

卷六十九

川渠

卷七十

陵園

欽定四庫全書

春明夢餘錄卷一

吏部左侍郎孫承澤撰

建置

昔黃帝建都於涿鹿卽京師地史稱帝都涿鹿之阿往來遷徙以兵爲營衛蓋燕地在漢以前通名爲涿至漢高帝六年始分燕置涿郡水經注引應劭云涿水出上谷涿鹿縣按涿水自涿鹿東注濕水濕水東南逕廣陽

郡與涿郡分水涿郡受其稱矣今保安州西南九十里
有涿鹿山黃帝破蚩尤於此州東南四十里有軒轅城
堯建都於冀燕冀地也古者中國之地分爲九州大河
以北爲冀堯都平陽此其甸服也及舜卽位以冀地太
廣始分冀東恒山之地爲并州東北醫無閭之地爲幽
州又分遼東等處爲營州皆冀也漢末曹操領冀州牧
又統名爲冀昌平有漢人張純碑稱冀州從事循古稱
也

周禮職方東北曰幽州釋名曰在北幽昧之地故曰幽也又曰燕之爲言燕也其氣內盛而燕宛也爾雅曰兩河間曰冀又冀近也

周封召公奭於燕封堯之後於薊史記注云薊今涿郡薊縣是也卽燕國之都水經注薊城西北隅有薊邱故以名之猶魯之曲阜齊之營邱

燕有二國一稱北燕姬姓召公所封一稱南燕姁姓黃帝之後地里志曰東郡燕縣南燕國無世家

不知其君諡號惟魯隱公五年衛人以燕師伐鄭
杜云南燕國莊公二十年鄭伯和王室不克執燕
仲父杜云南燕伯見傳耳此據左傳及註疏之文
是以北燕爲召公所封南燕爲黃帝之後也按史
記武王未及下車而封黃帝之後於薊註今涿郡
薊縣是也卽燕國之都孔安國司馬遷皆云燕國
召公與周同姓黃帝姓姬君奭蓋其後也或黃帝
之後封薊者滅絕而更封燕郡乎

秦始皇二十三年滅燕以爲廣陽郡漢高祖封盧綰爲燕王漢光武封叔父良爲廣陽王其城有萬載宮光明殿王莽改曰廣陽縣

廣陽水名水經注云廣陽水東南至陽鄉縣右注聖水聖水又東南逕陽鄉城西縣故涿之陽亭也志云陽鄉城在今府治西南二十五里

京西南有盧王屯在安次縣常道鄉二十五里漢燕王盧綰屯軍與劉賈夾攻燕者今名盧綰屯按

常道鄉在耿就橋西去安次縣五里唐貞觀中縣治也魏燕王宇子奐封常道鄉公卽此

幽州在唐爲范陽郡置盧龍軍節度使石晉天福元年割山後十六州賂契丹燕土遂爲遼有至金天輔五年以燕京及涿易檀順景薊六州還宋宋宣和四年改燕山府爲永清軍郭藥師叛金金人復取之地復歸金先是顯德中周世宗親策兵復瀛鄭諸州將抵幽病還宋太祖置封椿庫曰晉割幽燕以遺契丹使一方限於境

外朕甚憫之俟庫滿則以此酬之不然散滯財募勇士以圖攻取然終宋之世未能復也

宋太宗垂拱中吏部尚書宋琪請復幽燕疏其言幽燕情形甚悉疏畧曰大舉精甲以事討除靈旗所指燕城必降但徑路所趨不無險易必若取雄霸路直進不免更有陽城之圍蓋界河之北陂淀坦平北路行師非我所便况軍行不離於輜重賊來莫測其淺深欲望回轅西遶山路令大軍會於

易州循孤山之北涑水以西挾山而行援糧而進
涉涿水並大房抵桑乾河出安祖砦則東瞰燕城
裁及一舍此是周德威收燕之路自易水距此二
百餘里並是沿山村墅連延溪澗相接採薪汲水
我占上游東則林麓平岡非戎馬奔衝之地內排
槍弩步隊實王師備禦之方而於山上列白幟以
望之戎馬之來二十里外可悉數也從安祖砦西
北有盧師神祠是桑乾出山之口東及幽州四十

餘里趙德鈞作鎮之時欲遏西衝曾塹此水況河
次半有崖岸不可輕度其平處築城護之守以偏
師此斷彼之右臂也仍慮步奚爲寇可分雄勇兵
士三五百人至青白軍以來山中防遏此是新州
嬀川之間南出易州大路其桑乾河水屬燕城北
隅繞西壁而轉大軍如至城下於燕丹陵東北橫
堰此水灌入高粱河高粱岸狹桑水必溢可於駐
蹕寺東引入郊亭淀三五日瀰漫百餘里卽幽州

隔在水南王師可於州北繫浮梁以通北路賊騎
來援已隔水矣視此孤壘浹旬必克初宋太祖欲
取幽薊以地圖示趙普普曰圖必出曹翰帝曰然
又曰翰可取否普曰翰可取孰可守帝曰以翰守
之普曰翰死孰可代帝不語久之曰卿可謂遠慮
矣帝自此絕口不言伐燕及太宗平河東出討幽
薊久未班師普手疏極諫甚謂陛下信邪諂之徒
又謂望陛下精調御膳保養聖躬其言極切帝報

曰將帥不遵成算往復勞弊爲遼人所襲此責在
主將也朕踵百王之末粗致承平蓋念彼民陷於
塗炭將救焚而拯溺匪黷武以窮兵卿當悉之也
疆場之事已爲之備卿勿爲憂遂罷進取之兵而
宋之弱實基於此

遼會同元年立爲南京開泰元年號燕京金海陵貞元
元年以燕乃列國之名不當爲京師號稱中都元太祖
於貞祐乙亥平中都金主奔汴至至元四年城京師稱

大都

燕之稱京不始於遼也宋人方回曰燕將臧荼王
燕都薊今燕京大興府東北有薊縣又曰陶淵明
詠荆軻曰提劍出燕京蓋燕之名京久矣按燕京
易州西北乃金坡關卽紫荆關昌平之西乃居庸
關順州之北乃古北口景州東北乃松亭關平州
之東乃榆關卽山海關自後唐屬契丹安巴堅都
於此其地平州爲要害至遼天祚時其將張穀守

平州以平州降宋金人取之並擒天祚而遼亡時
宣和七年乙巳也至紹興二十年金主亮以上京
僻在一隅城燕京徙居之改析津府爲大興府號
中都以中京會寧府爲北京汴京開封府爲南京
而舊遼陽府爲東京大同爲西京如故元世祖問
劉秉忠曰今之定都惟上都大都耳何處最佳秉
忠曰上都國祚短民風淳大都國祚長民風淫遂
定都燕之計

明洪武元年改大興府爲北平府二年立北平行中書省三年封燕王九年革行省設承宣布政使司初欲建都於此以修撰鮑頻力諫而止永樂元年正月禮部尚書李至剛言北平布政司實興王之地宜遵太祖中都之制立爲京師制曰可其以北平爲北京上雖臨御猶稱行在十八年宮殿成去行在之號洪熙元年復稱行在正統六年復去之以應天府爲南京

洪武元年改北平府詔一海宇以安人心正國統

而君天下理勢所在古人皆然自羣雄乘亂以來
四方思治惟切元綱已隳疆土遂分孰拯斯民以
定於一顧予非德造此丕圖荷上天眷祐臣鄰翊
贊肇基江左平定中原睠惟幽薊實彼根本命將
北伐列郡皆順已於洪武元年八月初二日克取
燕城兵無犯於秋毫民不移於肆市捷音來奏殊
副朕懷今改燕城爲北平府命官屯守海宇旣同
國統斯正方與生民共享安平之福尚賴内外臣

僚夙夜公勤匡朕不逮

永樂十八年建北京詔開基創業興王之本爲先
繼體守成經國之宜尤重昔朕皇考太祖高皇帝
受天明命君主中華創立江左以肇邦基肆朕纘
承大統恢弘鴻業惟懷永圖眷茲北京實爲都會
地勢雄偉山川鞏固四方萬國道里適均惟天意
之所屬實卜筮之攸同乃倣古制徇輿情立兩京
置郊社宗廟創建宮室上以紹皇考太祖高皇帝

之先志下以開子孫萬世之弘規且於巡狩駐守
實有便焉爰自營建以來天下軍民樂於趨事天
人協贊景貺駢臻今工已告成選以永樂十九年
正月朔旦御奉天殿朝百官誕新治理用致雍熙
於戲天地清寧衍宗社萬年之福山河綏靖隆古
今全盛之基

永樂十九年北京御朝詔朕荷天地祖宗眷祐繼
承大統撫馭萬方夙夜祇勤率遵成憲乃者紹皇

考太祖高皇帝之志效成周卜洛之規建立兩京
爲子孫帝王萬世之基爰自經營以來賴天下臣
民殫竭心力涉寒暑冒風霜趨事赴工勤勞匪懈
朕心眷念拳切不忘今宮殿告成朕已御正朝祇
祀天地祖宗社稷懋圖治理嘉與維新重懷寬恤
之仁用廣好生之德大赦天下

史記天官書云中國山川東北流其維首在隴蜀
尾沒於勃碣唐書天文志云箕尾析木津也初尾

七度餘二千七百五十秒二十一少中箕五度終
南斗八度自渤海九河之北得漢河間涿郡廣陽
及上谷漁陽右北平遼西遼東樂浪元菟古北燕
孤竹無終九邊之國尾得雲漢之末派龜魚麗焉
當九河之下流濱於勃碣皆北紀之所窮也

京師地最高去通州四十里地高五丈河中置十
閘始可行舟去上都一千里地高四十丈

洪武初定淮甸得馮國用問以定天下大計國用

對曰金陵龍蟠虎踞真帝王之都願先渡江取金陵置都於此然後命將出師掃除羣寇倡仁義以收人心天下不難定也上曰吾意正如此及克太平召陶安問之對如國用且曰據長江之險出兵以臨四方何向不克此天所以資明公也上嘉納之遂定計取金陵擒元將陳瑄先等入其城遂置都焉其後既定中原復以汴梁爲北京以臨濠爲中都逮平陝西欲置都關中後以西北重地非自

將不可議建都於燕以鮑頻力諫而止金陵北阻
長江南扼吳會雖稱華麗然風氣之厚形勢之雄
終不如西北扼天下之喉而拊其背爲最勝昔孫
吳東晉以迄宋齊梁陳皆偏安江左迭興迭廢何
能爲帝王孔明所云鍾山龍蟠石城虎踞真帝王
之都者蓋當時欲與孫吳結好姑爲此言以廣其
意未必然也其後成祖改都燕京而以金陵爲南
京爰致太平垂三百禩可謂善繼先志矣

建文初戶部侍郎卓敬密奏曰燕王智慮絕人酷類先帝夫北平者強幹之地金元所由興也宜徙燕南昌以絕禍本夫萌而未動者幾也量時而爲者勢也勢非至勁莫能斷幾非至明莫能察建文不能用夫使卓司農之說行寧有靖難之事乎其後徙寧王於南昌及其叛也滅之不旋踵文皇蓋陰用其言也

郭子章都論古今論形勢之都曰秦曰洛而洛不

如秦則自漢以來言之婁敬說漢高曰洛陽天下
之中有德易以興無德易以亡秦地被山帶河四
塞以爲國案秦之故地揔天下之吭而拊其背也
張良曰洛陽四面受敵非用武之國關中左殽函
右隴蜀阻三面而易守敬說是也漢竟都關中二
百年而王莽篡宋藝祖欲都長安晉王諫曰在德
不在險藝祖曰吾將西遷者欲據山河之勝而去
冗兵都汴不出百年天下民力殫矣宋竟都汴百

五十年而徽欽擄議者謂洛不如秦似矣顧辟雍之詩曰考卜維王宅是鎬京維龜正之武王成之則周之都鎬卜也周書曰我卜河朔黎水我乃卜澗水東灋水西惟洛食我又卜灋水東亦惟洛食則周之都洛亦卜也夫周卜鎬西東南北無思不服矣而復惓惓營洛者豈知其子孫終東遷耶鎬距秦咫尺當其時何不卜秦而卜洛耶舍秦營洛周公未爲無見不徒專恃其德已也周歷八百都

洛五百豈洛之王氣或加於鎬秦耶微獨周也都
秦者西漢二百餘年唐二百八十年秦隋俱二世
亡其長短之數可睹已都洛者東漢百九十五年
魏晉百年唐末徙洛至宋靖康在汴洛間二百二
十年拓跋完顏又百年其長短之數又可睹已則
洛何以不如秦哉夫秦天下之首也洛天下之腹
也首之爲體尊而腹之受大其可以都一也明興
定都金陵似若循六朝之舊洪武初營汴爲北京

則亦周公意也末年東宮營秦則亦婁敬張良藝
祖意也而卒不果豈天將以待燕耶成祖之營燕
也當時臺諫交口不便主事蕭儀言之尤峻豈不
以燕爲金元故都非明所宜都乎豈不以金祚僅
百年元祚不盈百年非宜都乎蓋未識上意所屬
也成祖曰北平之遷吾與大臣密計數月而後行
今其所密計者卽不得聞以愚度之其說有四燕
非金元始也周爲召公封國由召公傳丹喜歷四

十三世九百餘年。眎周歷且過之。宜遷一古享國
長久者。靡不遷都。商始亳。遷耿。遷相。周始鎬。遷洛。
漢唐始秦。遷洛。宋始汴。遷杭。然皆迫於兵戈。旣於
侵逼不得已。而後去。故靖難之後。因而遷徙。亦以
爲子孫長久計耳。宜遷二西。漢起漢中都。秦東漢
起南陽都洛。唐起太原都秦。宋起宋州都汴。元起
開平都燕。明太祖起鳳陽都吳。成祖曰。吾起燕都。
燕耳。宜遷三天下之禍。莫烈於鹵。吾令子孫自當。

之廢幾四海豪傑輻輳都下足與鹵角宜遷四成
祖密計或不出此四者彼書生之見豈足以達英
雄之畧哉雖然北敵隔一邊垣正統己己之變嘉
靖庚戌之突可鑒也漕河僅一衣帶水元人海運
之制脫脫水田之議當講也果兵足以制鹵食足
以自固則太行易水之間卽國家億萬禩無疆之
宅也又何必問秦洛之強弱哉

李時勉北京賦惟皇明之受天命也我太祖皇帝

首仗義師以平暴亂豪傑景從聲振江漢削除僭
竊拯民塗炭定鼎金陵撫綏萬邦乃睠茲土實雄
朔方倣成周之卜洛遂竝建而未遑逮我聖上繼
明重光握乾御極一遵舊章仁聲洋溢乎遐邇恩
澤汪濊於八荒旣致治於太平遵皇衢以省方仰
先志之未遂度弘規以作京兆經營之伊始徧中
外其懼騰曰惟北都在冀之域右挾太行左據碣
石背疊險兮重關面平原兮廣澤宗恒獄其巍巍

鎮鑿閭而奕奕冠九州之形勝實爲天府之國是
以軒轅邑之以分州唐堯階之以爲帝擴神化以
宜民大勲德之光被爵王氣之所鍾於今茲而有
待也於是仰瞻析木俯測地靈龜筮兆吉天人叶
應神祇獻珍而山石自出河嶽效靈而神木自行
民子來兮相續期不日而功成爾乃懸水樹臬識
景表營方位既正高下既平羣力畢舉百工並興
建不拔之丕址拓萬雉之金城引天泉於西阜環

湯池而鏡清九衢百廛之通達連覺邃宇之縱橫
顧壯麗其若此非燕逸而娛情蓋所以強幹而弱
枝居重以御輕展皇儀而朝諸侯遵先軌而播風
聲者也若乃四郊砥平王道正直視萬國之環拱
遠居中而建極其南則萬流宗海平林蔽天攬邯
鄲鉅鹿之廣衍馳平疇沃野之綿延溘恒衛經
其野濡磁涑桑滙其前界以大陸廣阿之弘壤扼
以大茂井陘之連山包絡趙魏襟帶齊魯膏腴之

地綿亘三百餘里而極於黃河伊潁之川其水陸之所產卓犖繁盛蓋莫得而計焉其北則疊嶂巖危層巒蔽虧長城矗乎雲表百泉湧乎山隈壯天關而設險守一夫而莫開偉左盤而右顧究鳳舞而龍飛實磅礴而鬱積粵擁衛於邦畿包狼山上谷之阻據野狐獨石之危掩祖山木葉之離立連白登紫塞之逶迤控女真而極乎洮河之北鎮朔漠而逾乎瀚海之湄蒙苫之衆引弓之倫畏威懷

德相率而來歸其東則潞河通漕控引江淮肥如
灤涑灌注縈迴連峯片石之隘首陽崆峒之崖玉
田白壁神仙瑤臺超無終而越金山跨遼瀋而逾
鴨綠至於暘谷日出之涯固已遐哉邈乎而莫不
在乎綏懷環以大海衆水所歸洪濤巨浪洶湧崔
嵬蓋不知其幾千萬里而蠻商番舶帆檣隱天上
下不絕而往來又有蓬瀛方壺鳳麟聚窟十洲三
島靈異非一流精之闕瓊華之室墉城宮堯金臺

岑律紫氣丹青景雲矚目靈囿倏仝安期羨門之
倫相與從游於其間出入隱見而恍惚瞻帝京其
伊邇庶可見其騷鸞駕鶴之髣髴其西則崇山鬱
翠高挹泰岱北接居庸南首河內奇峯擁關龍門
阻隘玉泉垂虹青煙浮黛上截窠兮倚空下蟠據
而際海其麓則有渾河湯湯西湖泱泱鹽溝琉璃
桑乾廣揚雪波泛湧灝漾汪洋一瀉千里會流帝
鄉又有上林禁苑種植畜牧連郊踰畿緣邱彌谷

澤渚川匯若大湖瀛海渺瀰而相屬其中則有奇
花珍果嘉樹甘木禽獸魚鱉豐殖繁育颼颼籍籍
不可得而盡錄固可以因農隙而校田獵選車徒
以講武事乃遵國風稽王制詔期門簡將帥乘玉
輅擁翠蓋出天關而雷轟轡芳郊而雲會非所以
黷武觀兵娛樂騁意蓋將取不姓而除菑害狩無
擇而順殺氣謹大易之用於三驅之時驗騶虞之
仁於一發之際水衡虞人之容與武夫壯士之奮

厲皆知夫仁者之為勇而投石超距之足鄙亦何
必殄夷禽獸割鮮野食而以俛仰極樂之為貴也
若夫其宮室之制則損益乎黃帝合宮之宜式遵
乎太祖貽謀之良居高以臨下背陰而面陽奉天
凌霄以磊砢謹身鎮極而崢嶸華蓋穹崇以造天
儼特處乎中央上倣象夫天體之圓下效法乎坤
德之方兩觀對峙以嶽立五門高矗乎昊蒼飛閣
屹以奠乎四表瓊樓鬼以立於兩旁廟社並列左

右相當東崇文華重國家之大本西翊武英嚴齋
居而存誠彤庭玉砌壁檻華廊飛簷下啄叢楹高
驥闕閭闔其蕩蕩儼帝居於將將玉戶繁華星之
烱晃璇題納明月而輝煌寶珠焜耀於天闕金龍
天矯於虹梁藻井煥發綺窓玲瓏建瓴聯絡複道
迴衝軼霄漢以上出俯日月而盪胸五色炫映金
碧晶熒浮輝揚耀霞彩雲紅其後則奉先之殿仁
壽之宮乾清坤寧眇麗穹窿掖庭椒房閨闈閼通

其前則郊建圓邱合祭天地山川壇壝恭肅明祀
至於五軍庶府之司六卿百僚之位嚴署宇之齊
設比館舍而並置列大明之東西割文武而制異
至於京尹赤縣之治所王侯貴戚之邸第辟雍成
均育賢之地守羽林而掌飲飛者至九十而有四
衛莫不井列而碁布各雄壯而偉麗其后廊之上
則有臯夔稷契之倫元凱俊乂之輩相與膺虞廷
之歌談羲農之際罄補袞之能懷忠貞之志考禮

文於大備贊聲樂之盡美是以朝無缺政德教漸
暨薄海內外均陶至治幸其有作聿來趨事成此
大功忘其劬勩人和既極休徵滋至慶雲瑞靄之
覆於闕庭素鳥元兎之獻於丹陛醴泉屢出甘露
數隆麒麟騶虞之珍馴獅天馬之類紛紜雜還莫
能殫記於以見天眷之益隆而聖德之純備者也
於是正月上日工既訖功爰告成於天地肆紹美
於祖宗清心凝慮齋沐肅雍粢盛既潔牲牷既豐

芬郁郁以旁達靈續其來降錫嘉貺之穰穰介
景福於帝躬將順應於昌期趾盛美於無窮乃服
袞冕御帝座開九重之深宮受萬邦之朝賀內侯
甸而要荒外殊方而異俗胥近悅而遠來紛鼓舞
而匍匐方物溢以充庭參絢燦而駭矚率舞蹈於
階墀效華封之三祝爾乃浹和會昭景鑠鏗鯨鐘
奏雅樂詔光祿以開筵合百辟而燕樂饌珍玉兮
芳馨壘瓊漿以斟酌聯韶蟬兮夾陛雜蠻夷之荒

服莫不酣暢而飽德咸頌歌而踴躍越填城而溢
郭藹歡聲於寥廓斯可以媲太古之無爲慶華胥
而蹈栗陸顧皇上之謙抑視至治爲未足於是降
德音播嘉惠省刑罰薄賦稅汰冗濁旌廉吏舉賢
才擢俊乂發倉廩賑貧匱尊高年而禮有德慎防
禦而修武備貴爵重賞以厲廉恥厚往薄來以馭
遐裔蓋欲使人知所本士知所勵四方萬國無一
民之失所窮陬僻壤無一物之不遂舉陶於春風

和煦之中而樂於雍熙泰和之治此蓋堯舜兢兢業
之心文王敬止之意所以紹鴻業繼先志益宏遠
而有偉故不勞而甚易冠絕乎前古垂休於後世
固可必聖子之與神孫益昌盛而無替小臣微陋
忝職文字願賦帝都之盛繁揚國美於萬禩復爲
之歌曰煌煌帝都兮逾鎬豐阻山帶河兮壯以雄
天開日明兮王氣所鍾穹隆造天兮惟帝之宮廓
氛祲兮開溟濛鎮中外兮宣皇風王道平平兮四

方來同願皇圖之鞏固歷萬世兮無窮

元人攜李顧淵白嘗入京獻燕都賦翰林元復初
不喜曰今大朝四海一統六合一家燕蓋昔時戰
國名何燕之稱

春明夢餘錄卷一